

## AL È TRESESIN, IL PRIN COMUN IN F-VJ A METI IN VORE IL PLAN SPECIÂL DI POLITICHE LINGUISTICHE

*Sodisfazion de ARLeF*

Il Comun di Tresesin al è il prin, in regjon, a indotâsi dal Plan speciâl di politiche linguistiche (PSPL) 2018-2022. La delibare e je di pôc timp stade fate buine de zonte, in presince de ARLeF, che e à colaborât ae definizion dal Plan. La Aministrazion locâl e rispiete cussì ce che al è previodût sedi dal articul 27 de L. R. 29/20017 ("Normis pe tutele, valorizazion e promoziun de lenghe furlane") sedi de delibare seguitive de Z.R. n. 1039/2015.

«O crodìn intune lenghe furlane vive e vivude – al sclaris l'assessôr comunâl ae culture, servizis scolastics e valorizazion de lenghe furlane -, che e à di jessi strument di cognossince e di comunicazion cuotidiane pe int dal teritori. Di doprâ simpri e in ogni ocasion, private o publiche. O saressin contents di podê rapresentâ un esempli ancje par chês altris aministrazions locâls».

"Dopo de aprovazion dal PGJPL intal 2015, e in coerence cun ce che al è stât definît intal stes plan gjenerâl, la ARLeF - al sclaris il President dal Ent – e je lade indevant a progjetâ e/o a poiâ une schirie di ativitâts, che o podaressin definî "buinis praticis", sedi indreçadis a ents publics che a concessionaris di servizis publics; cheste ativitât e à contribuît a meti adun un patrimoni di azions positivis a disposizion di chescj sogjets pe predisposizion dai lôr Plans Speciâi di Politiche Linguistiche (PSPL), struments strategjics previodûts de LR 29/07. Simpri la ARLeF e à preparât diviers modei di PSPL che a son a disposizion dai sogjets interessâts.

Ancje se la ativitât e i stimui dâts de Agjenzie a son stâts tancj, ancje dilunc de ultime Conference di Valutazion organizade de Regjon, e je vignude fûr la lungjece de bande de aministrazion publiche tal indotâsi dai PSPL, e chest nol jude tal dâ continuitât e coerence ai intervents di politiche linguistiche.

O vin duncje une grande sodisfazion pe decision dal Comun di Tresesin che, tant che prin intal teritori furlanofon, si indote di un PSPL; in graciis di chest Plan l'Ent si impegne a planificâ e a fâ, ancje in forme graduâl cun obietîfs intermedis, lis sôs ativitâts di promoziun e di poie de lenghe furlane. Al è un document otim e une iniziative politiche cetant juste e si augurin che a sedin altris comuns furlans a fâ compagn, intal rispiet de normative in vore, dai dirits linguistics dai citadins e inte plene cussience dal valôr di une identitât vierte e moderne ma fondade su la ricjece de culture e des lenghis, dutis lis lenghis, dal teritori."

Tra lis prioritâts di meti in vore in tims curts (cualchidune in realtât e je za stade inviade), il Comun al previôt, in colaborazion cu la ARLeF, la organizazion di cors di gramatiche furlane pai dipendents comunâi che a àn za une paronance orâl complete de lenghe, di mût che i ats e lis delibaris a puedin jessi scrits ancje par furlan; la redazion bilengâl dal sît internet; la

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / e-mail: [arlef@caltpr.it](mailto:arlef@caltpr.it)

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

modificazion de segnaletiche interne e di chê esterne di duçj i edificis publics che a son dal Comun; la modificazion des scritis esternis, intai supuarts visîfs e intai mieçs di traspuart; la modificazion bilengâl di duçj i cartei stradâi che a àn la indicazion di dulà che al tache e di dulà che al finis ilcentri abitât (ancje intes fraziions e localitâts minôrs) e di dute la segnaletiche stradâl di indicazion gjestide dal Comun stes.

In maniere significative, cun di plui, Tresesin al presentarà la sô candidature uficiâl par jessi sede, intune des prossim ediziions, de Fieste de Patrie dal Friûl.

*Udin, ai 3 di Avrîl dal 2018*

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF CALT** relazioni pubbliche Tel. + 39 0432 229127 / **e-mail: arlef@caltpr.it**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<